

## ANEXO

## Lista de actividades

Actividades de produción, transformación, manipulación e distribución por xunto de mercadorías:

Pesca. NACE B.

Industria da alimentación, bebidas e tabaco. NACE DA.

Industria da confección e da peletería. NACE 17.4, 17.5 17.6, 17 e 18.

Industria do coiro e calzado. NACE DC.

Industria do papel, edición, artes gráficas e reprodución de soportes gravados. NACE DE.

Industria química. NACE 24.

Prefabricados para a construción NACE 45.25, 45.3, 45.4, 20.2, 20.3, 25.2, 26.1, 26.2, 26.3, 26.4, 26.7, 24.3, 28.1, 28.2, 28.12, 28.63, 28.7 e 36.1.

Industria da construción de maquinaria e equipo mecánico. NACE 29.

Industria de material e equipo eléctrico, electrónico e óptico. NACE DL.

Fabricación de mobles; outras industrias manufactureras. NACE 36.

Industria da reciclaxe. NACE 37.

Comercio por xunto e intermediarios do comercio. NACE 50 e 51.

Actividades de servizos:

Transportes e actividades anexas. NACE I.

Actividades informáticas. NACE 72.

Servizos relacionados coa explotación de recursos naturais e eliminación de residuos. NACE n.c.

Servizos relacionados coa investigación e o desenvolvemento. NACE 73.

Outras actividades empresariais. NACE 74.

Servizos de formación especializada e posgrao. 80.3 e 80.4.

Os centros de coordinación e servizos intragrupo están excluídos das actividades de servizos comprendidos no grupo 74 da NACE («Outras actividades empresariais»).

**11833** REAL DECRETO LEI 3/2000, do 23 de xuño, polo que se aproban medidas fiscais urxentes de estímulo ó aforro familiar e á pequena e mediana empresa. («BOE» 151, do 24-7-2000.)

## I

O presente real decreto lei contén unha serie de medidas fiscais de apoio ás empresas e de fomento do aforro e o investimento. En particular, afectan á tributación das pequenas e medianas empresas, ó tratamento fiscal das contribucións a plans de pensións e ó réxime tributario das ganancias e perdas patrimoniais.

Estas medidas de fomento resultan necesarias na actual conxuntura económica, para garanti-lo crecemento estable da economía española e evita-lo afloramento de presións inflacionistas. A consecución deste obxectivo fai imprescindible, así mesmo, a aplicación das medidas con carácter inmediato.

Ademais, o risco de que o anuncio dunhas reformas desta natureza poida provoca-la paralización nas decisións de investimento, así como a necesidade de que os cidadáns coñezan con certeza e coa suficiente antelación as consecuencias fiscais que terán as ditas decisións, esixen a utilización da vía do real decreto lei, conseguindo así que se produzan os seus efectos de maneira inmediata ás medidas que a seguir se describen.

## II

En primeiro lugar, maniféstase unha decidida aposta polo apoio ás pequenas e medianas empresas e ás iniciativas de innovación e internacionalización empresarial, como fórmula para mellora-la súa competitividade e, polo tanto, como garantía da súa supervivencia nun contorno globalizado e rapidamente cambiante.

Polo que se refire ás medidas de apoio ás pequenas e medianas empresas, que constitúen a verdadeira columna vertebral da nosa economía e que tanta importancia teñen no seu crecemento e innovación, en primeiro lugar amplíase significativamente o ámbito de aplicación do réxime especial do imposto sobre sociedades, co que un gran número de empresas poderán gozar dos incentivos fiscais alí establecidos e se mellora o réxime do reinvestimento de beneficios empresariais.

Por outra parte, considerando a importancia das novas tecnoloxías e coa vontade de apoia-lo espírito innovador e emprendedor das nosas empresas, establécese un incentivo fiscal para aquelas actuacións que teñan como obxectivo mellora-lo seu acceso e presenza na Internet, así como o desenvolvemento do comercio electrónico e a mellora, en xeral, dos seus procesos mediante a incorporación de tecnoloxías da información e das comunicacións.

Do mesmo modo, mediante novos incentivos fiscais no imposto sobre sociedades ou mediante a mellora dos existentes, foméntase a formación do persoal no uso de novas tecnoloxías, así como os investimentos en innovación tecnolóxica das empresas. Na mesma liña de apoio ás novas empresas, emprendedoras e innovadoras, hai que considera-las melloras no réxime do capital-risco, como fórmula para o financiamento de iniciativas.

## III

No que se refire ó tratamento fiscal das contribucións a plans de pensións, hai que recordar que o fomento dos sistemas complementarios de previsión social foi un dos principais aspectos que xurdiron no denominado Pacto de Toledo. Nesta dirección, o presente real decreto lei introduce melloras no réxime fiscal dos plans de pensións e, conseguintemente, das mutualidades de previsión social, como a seguir se expón:

En primeiro lugar, realízase unha elevación dos límites xerais de redución na base imponible por contribucións a plans de pensións e mutualidades de previsión, así como dos aplicables no caso de partícipes de maior idade e de persoas con minusvalidez.

En concreto, os límites xerais sitúanse en 1.200.000 pesetas e o 25 por 100 dos rendementos netos do traballo e de actividades económicas, o que implica unha elevación do límite absoluto en 100.000 pesetas e do relativo en 5 puntos porcentuais. No caso de persoas de maior idade, elévase o límite máximo de contribución en 300.000 pesetas e en 20 puntos porcentuais, quedando situados, respectivamente, en 2.500.000 pesetas e o 40 por 100. Finalmente, no caso de persoas con minusvalidez, elévase o límite absoluto en 300.000 pesetas, quedando situado en 2.500.000 pesetas.

En segundo lugar, prodúcese unha extensión do réxime fiscal dos plans de pensións a aqueles cónxuxes que non traballan fóra do lar familiar. A medida incorporada ó proxecto implica un favorecemento do aforro familiar e responde a unha demanda social existente na actualidade.

Ó respecto, debe sinalarse que os límites de redución por contribucións a plans de pensións se aplican sobre os rendementos obtidos individualmente por cada contribuínte. Isto suscita o problema da imposibilidade de que efectúen contribucións reducibles a plans de pen-

sións os cónxuxes que non traballan fóra do lar familiar, malia que, en moitas ocasións, contribúen, a través do traballo doméstico, á obtención de rendementos por parte do cónxuxe.

Coa modificación que se incorpora permítese que as contribucións efectuadas ós plans de pensións das que sexan titulares os cónxuxes que obteñan rendementos do traballo e de actividades económicas inferiores a 1.200.000 pesetas, poidan ser obxecto de redución na base impositiva do outro cónxuxe, co límite máximo de 300.000 pesetas anuais.

De maneira coherente coas melloras introducidas no réxime fiscal dos plans de pensións, mellórase a tributación das prestacións derivadas de seguros de vida, aumentando os coeficientes reductores aplicables para a determinación do rendimento neto correspondente.

#### IV

No que respecta ó tratamento no imposto sobre a renda das persoas físicas das ganancias e perdas patrimoniais, en primeiro lugar establécese a inclusión na parte especial da base impositiva do imposto daquelas derivadas da transmisión de elementos patrimoniais adquiridos con máis dun ano de antelación, o que supón unha rebaixa do prazo de dous anos ata agora vixente.

A principal finalidade desta medida radica en evitar que a toma de decisións de investimento polo cidadán se vexa drasticamente condicionada pola influencia do prazo previsto na actual normativa. Efectivamente, o mantemento dos investimentos durante máis de dous anos para conseguirla aplicación do gravame previsto para este tipo de rendas pode resultar un prazo demasiado dilatado, polo que a súa redución contribúe a unha maior eficiencia nas decisións de investimento dos particulares.

O mesmo tempo, en concordancia coa rebaixa impositiva levada a cabo pola Lei 40/1998, do 9 de decembro, do imposto sobre a renda das persoas físicas e outras normas tributarias, redúcese o tempo impositivo aplicable a este tipo de rendas do 20 ó 18 por 100, equiparándoo así co tipo mínimo ó que se grava a parte xeral da base impositiva. O fundamento desta medida é dobre: por unha parte, contribuirá sen dúbida a facer máis atractiva a alternativa do aforro fronte ó consumo e, por outra, asegurará que ningún contribuínte poida ver sometidas as rendas que se integran na parte especial da base impositiva a un gravame superior ó correspondente ás que se integran na parte xeral da dita base.

En coherencia co novo tipo de gravame, rebáixase ó 18 por 100 a porcentaxe de retención aplicable ás rendas obtidas como consecuencia das transmisións ou reembolsos de accións ou participacións en institucións de investimento colectivo.

#### V

Co obxectivo de apoiar as iniciativas de internacionalización das nosas empresas, modifícase o réxime para evita-la dobre imposición económica internacional polas actividades empresariais desenvolvidas no estranxeiro a través de entidades filiais ou por medio de establecementos permanentes situados no estranxeiro. A aplicación do método de exención para estas rendas favorece a internacionalización das empresas españolas ó mellora-la súa posición competitiva no ámbito internacional. Non obstante, a modificación do réxime para evita-la dobre imposición acompáñase de medidas antiabuso que tratan de evita-la deslocalización artificial de actividades empresariais.

Así mesmo, establécese un novo incentivo fiscal no imposto sobre sociedades que complementa as medidas

tendentes a favorecer a implantación das empresas españolas no exterior, permitindo diferir-lo pagamento do dito imposto naqueles casos en que se realicen investimentos no estranxeiro mediante a toma de participacións no capital de sociedades non residentes que desenvolvan actividades empresariais. En particular, permítese que o suxeito pasivo poida reduci-la súa base impositiva no importe do investimento realizado, integrándose na base impositiva dos períodos impositivos posteriores o importe deducido.

#### VI

Por último, neste real decreto lei abórdanse outras medidas tamén de gran transcendencia económica e social.

En primeiro lugar, co obxectivo de culmina-la reforma do imposto sobre a renda das persoas físicas no que se refire ó tratamento da vivenda habitual e tendo en conta o carácter complementario daquel que debe te-lo imposto sobre o patrimonio, establécese a exención neste último imposto da vivenda habitual do contribuínte, cando menos na medida en que o seu valor fiscal non exceda de 25.000.000 de pesetas.

En segundo lugar, establécese o réxime no imposto sobre a renda das persoas físicas e no imposto sobre sociedades do préstamo de valores, co obxectivo de facilita-la realización destas operacións nos mercados financeiros españois.

Na súa virtude, en uso da autorización contida no artigo 86 da Constitución, e logo de deliberación do Consello de Ministros na súa reunión do día 23 de xuño de 2000,

DISPONGO:

### TÍTULO I

#### Medidas relativas ás pequenas e medianas empresas e ás empresas innovadoras

**Artigo primeiro.** *Ámbito de aplicación do réxime especial das empresas de reducida dimensión no imposto sobre sociedades.*

Con efectos para os períodos impositivos que se inicien a partir da entrada en vigor deste real decreto lei, o artigo 122 da Lei 43/1995, do 27 de decembro, do imposto sobre sociedades, queda redactado da seguinte maneira:

«Artigo 122. *Ámbito de aplicación: cifra de negocios.*

1. Os incentivos fiscais establecidos no presente capítulo aplicaranse sempre que o importe neto da cifra de negocios habida no período impositivo inmediato anterior sexa inferior a 3 millóns de euros (499.158.000 pesetas).

2. Cando a entidade for de nova creación, o importe da cifra de negocios referirase ó primeiro período impositivo en que se desenvolva efectivamente a actividade. Se o período impositivo inmediato anterior tivo unha duración inferior ó ano, ou a actividade se desenvolveu durante un prazo tamén inferior, o importe neto da cifra de negocios elevarase ó ano.

3. Cando a entidade forme parte dun grupo de sociedades no sentido do artigo 42 do Código de comercio, o importe neto da cifra de negocios referirase ó conxunto de entidades pertencentes

ó dito grupo. Tamén se aplicará este criterio cando unha persoa física por si soa ou conxuntamente con outras persoas físicas unidas por vínculos de parentesco en liña directa ou colateral, consanguínea ou por afinidade, ata o segundo grao inclusive, se encontren con relación a outras entidades das que sexan socios nalgún dos casos a que se refire o artigo 42 do Código de comercio.

Para o efectos do disposto neste número, entenderase que os casos do artigo 42 do Código de comercio son os determinados na sección 1.<sup>a</sup> do capítulo primeiro das normas para a formulación das contas anuais consolidadas, aprobadas polo Real decreto 1815/1991, do 20 de decembro.»

**Artigo segundo.** *Incentivos ó reinvestimento en empresas de reducida dimensión.*

Con efectos para os períodos impositivos que se inicien a partir da entrada en vigor do presente real decreto lei, o artigo 127 da Lei 43/1995, do 27 de decembro, do imposto sobre sociedades, queda redactado da seguinte maneira:

«Artigo 127. *Amortización de elementos patrimoniais obxecto de reinvestimento.*

1. Os elementos do inmovilizado material afectos a explotacións económicas nos que se materialice o reinvestimento do importe total obtido na transmisión onerosa de elementos do inmovilizado material, tamén afectos a explotacións económicas, realizada no período impositivo no que se cumpran as condicións do artigo 122 desta lei, poderán amortizarse en función do coeficiente que resulte de multiplicar por 3 o coeficiente de amortización lineal máximo previsto nas táboas de amortización oficialmente aprobadas. O reinvestimento deberá realizarse dentro do prazo ó que se refire o artigo 21.1 desta lei.

2. Cando o importe investido sexa superior ou inferior ó obtido na transmisión, a amortización á que se refire o número anterior aplicarase só sobre o importe da dita transmisión que sexa obxecto de reinvestimento.

3. A deducción do exceso de cantidade amortizable resultante do previsto neste artigo respecto da depreciación efectivamente habida, non estará condicionada á súa imputación contable na conta de perdas e ganancias.»

**Artigo terceiro.** *Deducción para o fomento do uso das novas tecnoloxías polas empresas de reducida dimensión.*

Con efectos para os períodos impositivos que se inicien a partir da entrada en vigor deste real decreto lei, engádesse un novo artigo 33 bis na Lei 43/1995, do 27 de decembro, do imposto sobre sociedades, que queda redactado da seguinte maneira:

«Artigo 33 bis. *Deducción para o fomento das tecnoloxías da información e da comunicación.*

1. As entidades que cumpran os requisitos establecidos no artigo 122 desta lei terán dereito a unha deducción na cota íntegra do 10 por 100 do importe dos investimentos e dos gastos do período relacionados coa mellora da súa capacidade de acceso e manexo de información de transaccións comerciais a través da Internet, así como coa mellora dos seus procesos internos mediante o uso de

tecnoloxías da información e da comunicación, que se especifican a continuación:

a) Acceso á Internet, que incluirá:

Adquisición de equipos e terminais, co seu “software” e periféricos asociados, para a conexión á Internet e acceso a facilidades de correo electrónico.

Adquisición de equipos de comunicacións específicos para conectar redes internas de ordenadores á Internet.

Instalación e implantación dos ditos sistemas.

Formación do persoal da empresa para o seu uso.

b) Presencia na Internet, que incluirá:

Adquisición de equipos, con “software” e periféricos asociados, para o desenvolvemento e publicación de páxinas e portais “Web”.

Realización de traballos, internos ou contratados a terceiros, para o deseño e desenvolvemento de páxinas e portais “Web”.

Instalación e implantación dos ditos sistemas.

Formación do persoal da empresa para o seu uso.

c) Comercio electrónico, que incluirá:

Adquisición de equipos, co seu “software” e periféricos asociados, para a implantación de comercio electrónico a través da Internet coas adecuadas garantías de seguridade e confidencialidade das transaccións.

Adquisición de equipos, co seu “software” e periféricos asociados, para a implantación de comercio electrónico a través de redes cerradas formadas por agrupacións de empresas clientes e provedores.

Instalación e implantación dos ditos sistemas.

Formación do persoal da empresa para o seu uso.

d) Incorporación das tecnoloxías da información e das comunicacións ós procesos empresariais, que incluirá:

Adquisición de equipos e paquetes de “software” específicos para a interconexión de ordenadores, a integración de voz e datos e a creación de configuracións Intranet.

Adquisición de paquetes de “software” para aplicacións a procesos específicos de xestión, deseño e produción.

Instalación e implantación dos ditos sistemas.

Formación do persoal da empresa para o seu uso.

2. Esta deducción será incompatible para os mesmos investimentos ou gastos coas demais previstas no presente capítulo. A parte de investimento ou do gasto financiada con subvencións non dará dereito á deducción.»

**Artigo cuarto.** *Deducción por gastos de formación do persoal no uso das novas tecnoloxías.*

Con efectos para os períodos impositivos que se inicien a partir da entrada en vigor do presente real decreto lei, engádesse un novo número 3 no artigo 36 da Lei 43/1995, do 27 de decembro, do imposto sobre sociedades, coa seguinte redacción:

«3. A deducción tamén se aplicará por aqueles gastos efectuados pola entidade coa finalidade de

habitua-los empregados na utilización de novas tecnoloxías. Inclúense entre os ditos gastos os realizados para financia-la súa conexión á Internet e os equipos para o acceso a aquela, mesmo cando o seu uso polos empregados se poida efectuar fóra do lugar e horario de traballo. Os gastos ós que se refire este número terán a consideración, para efectos fiscais, de gastos de formación de persoal e non determinarán a obtención dun rendemento do traballo para o empregado.»

**Artigo quinto.** *Modificación da deducción por actividades de investigación científica e innovación tecnolóxica no imposto sobre sociedades.*

Con efectos para os períodos impositivos que se inicien a partir da entrada en vigor deste real decreto lei, o artigo 37 da Lei 43/1995, do 27 de decembro, do imposto sobre sociedades, queda redactado da seguinte maneira:

«Artigo 37. *Normas comúns ás deducións previstas no presente capítulo.*

1. As deducións previstas no presente capítulo practícaranse unha vez realizadas as deducións e bonificacións dos capítulos II e III deste título.

As cantidades correspondentes ó período impositivo non deducidas poderán aplicarse nas liquidacións dos períodos impositivos que conclúan nos cinco anos inmediatos e sucesivos. Non obstante, as cantidades correspondentes ás deducións previstas nos artigos 33 e 33 bis desta lei poderán aplicarse nas liquidacións dos períodos impositivos que conclúan nos dez anos inmediatos e sucesivos.

O cómputo dos prazos para a aplicación das deducións previstas no presente capítulo poderá diferirse ata o primeiro exercicio en que, dentro do período de prescrición, se produzan resultados positivos, nos seguintes casos:

- a) Nas entidades de nova creación.
- b) Nas entidades que saneen perdas de exercicios anteriores mediante a achega efectiva de novos recursos, sen que se considere como tal a aplicación ou capitalización de reservas.

O importe das deducións previstas neste capítulo ás que se refire o presente número, aplicadas no período impositivo, non poderán exceder conxuntamente do 35 por 100 da cota íntegra minorada nas deducións para evita-la dobre imposición interna e internacional e as bonificacións. Non obstante, o límite elevarase ó 45 por 100 cando o importe da deducción prevista nos artigos 33 e 33 bis, que correspondan a gastos e investimentos efectuados no propio período impositivo, exceda do 10 por 100 da cota íntegra, minorada nas deducións para evita-la dobre imposición interna e internacional e as bonificacións.

2. Un mesmo investimento non poderá dar lugar á aplicación da deducción en máis dunha entidade.

3. Os elementos patrimoniais afectos ás deducións previstas nos artigos anteriores deberán permanecer en funcionamento durante cinco anos ou durante a súa vida útil se for inferior.

Conxuntamente coa cota correspondente ó período impositivo no que se manifeste o incumprimento deste requisito, ingresarase a cantidade deducida, ademais dos xuros de demora.»

**Artigo sexto.** *Reducción a un ano do prazo para a bonificación das plusvalías obtidas por sociedades e fondos de capital-risco.*

Con efectos para os períodos impositivos que se inicien a partir da entrada en vigor do presente real decreto lei, o artigo 69 da Lei 43/1995, do 27 de decembro, do imposto sobre sociedades, queda redactado da seguinte maneira:

«Artigo 69. *Sociedades e fondos de capital-risco.*

1. As sociedades e fondos de capital-risco, reguladas na Lei 1/1999, do 5 de xaneiro, reguladora das entidades de capital-risco e das súas sociedades xestoras, beneficiaranse de exención parcial polas rendas que obteñan na transmisión de accións e participacións no capital das empresas, á que se refire o artigo 2.1 da citada lei, en que participen, segundo o ano de transmisión computado desde o momento da adquisición. A dita exención será do 99 por 100 a partir do inicio do segundo ano e ata o duodécimo, inclusive.

Excepcionalmente poderá admitirse unha ampliación deste último prazo ata o décimo sétimo ano, inclusive. Regulamentariamente determinaranse os supostos, condicións e requisitos que habilitan para a dita ampliación.

Con excepción do suposto considerado no parágrafo anterior, no primeiro ano e a partir do décimo segundo non se aplicará a exención.

2. Os dividendos e, en xeral, as participacións en beneficios percibidos das sociedades que as sociedades e fondos de capital-risco promovan ou fomenten gozarán da deducción prevista no artigo 28.2 desta lei calquera que sexa a porcentaxe de participación e o tempo de posesión das accións ou participacións.

3. Os dividendos e, en xeral, as participacións en beneficios percibidos das sociedades e fondos de capital-risco beneficiaranse da deducción prevista no artigo 28.2 desta lei calquera que sexa a porcentaxe de participación e o tempo de posesión das accións ou participacións.»

## TÍTULO II

### Medidas relativas ós plans de pensións e seguros de vida

**Artigo sétimo.** *Elevación dos límites de redución na base imponible do imposto sobre a renda das persoas físicas por contribucións a plans de pensións. Extensión do réxime fiscal dos plans de pensións ós cónxuxes dos perceptores dos rendementos.*

Dáselle nova redacción ó punto 4.º e engádense dous novos puntos 5.º e 6.º ó número 1 do artigo 46 da Lei 40/1998, do 9 de decembro, do imposto sobre a renda das persoas físicas e outras normas tributarias, nos seguintes termos:

«4.º As contribucións realizadas polos partícipes en plans de pensións, incluíndo as contribucións do promotor que lles fosen imputadas en concepto de rendemento do traballo.

5.º Como límite máximo conxunto destas reducións aplicarase a menor das cantidades seguintes:

a) O 25 por 100 da suma dos rendementos netos do traballo e de actividades económicas percibidos individualmente no exercicio.

Para estes efectos, consideraranse rendementos de actividades económicas os imputados polas

sociedades transparentes reguladas no artigo 75, número 1, alíneas b) e c), da Lei 43/1995, do 27 de decembro, do imposto sobre sociedades, ós seus socios que, efectivamente, exerzan a súa actividade a través delas como profesionais, artistas ou deportistas.

Non obstante, no caso de partícipes maiores de cincuenta e dous anos, a porcentaxe anterior será o 40 por 100.

b) 1.200.000 pesetas (7.212,15 euros) anuais.

Non obstante, no caso de partícipes maiores de cincuenta e dous anos, o límite anterior incrementarase en 100.000 pesetas (601,01 euros) adicionais por cada ano de idade do partícipe que exceda de cincuenta e dous, fixándose en 2.500.000 pesetas (15.025,30 euros) para partícipes de sesenta e cinco anos ou máis.

6.º Ademais das reducións realizadas de acordo cos límites anteriores, os contribuíntes dos que o cónxuxe obteña rendementos netos do traballo e de actividades económicas inferiores a 1.200.000 pesetas (7.212,15 euros) poderán reducir na base imponible as contribucións realizadas a plans de pensións dos que sexa partícipe o dito cónxuxe, co límite máximo de 300.000 pesetas (1.803,04 euros) anuais.»

**Artigo oitavo.** *Elevación dos límites aplicables ós plans de pensións e mutualidades de previsión social constituídos a favor de persoas con minusvalidez.*

As contías de 1.100.000 pesetas (6.611,13 euros) e 2.200.000 pesetas (13.222,27 euros) ás que se refire a disposición adicional décimo sétima da Lei 40/1998, do 9 de decembro, do imposto sobre a renda das persoas físicas e outras normas tributarias, elévanse a 1.200.000 pesetas (7.212,15 euros) e 2.500.000 pesetas (15.025,30 euros), respectivamente.

**Artigo noveno.** *Elevación dos límites de contribución a plans de pensións.*

Dáselle nova redacción ó número 3 do artigo 5 da Lei 8/1987, do 8 de xuño, de regulación dos plans e fondos de pensións, que quedará redactado nos seguintes termos:

«3. As contribucións anuais máximas ós plans de pensións reguladas na presente lei, con inclusión, se é o caso, das que os promotores dos ditos plans lles imputan ós partícipes, non poderán exceder, en ningún caso, de 1.200.000 pesetas (7.212,15 euros).

Non obstante, no caso de partícipes maiores de cincuenta e dous anos ós que pola súa idade a dita cantidade lles resulta insuficiente, o límite anterior incrementarase en 100.000 pesetas (601,01 euros) adicionais por cada ano de idade do partícipe que exceda de cincuenta e dous, fixándose en 2.500.000 pesetas (15.025,30 euros) para partícipes de sesenta e cinco anos ou máis.

O límite máximo establecido neste número aplicaráselle individualmente a cada partícipe integrada na unidade familiar.»

**Artigo décimo.** *Elevación dos coeficientes reductores aplicables ós rendementos derivados de contratos de seguro de vida.*

Nos artigos 17.2, alíneas c) e d), e 24.2, alíneas b) e c), da Lei 40/1998, do 9 de decembro, do imposto

sobre a renda das persoas físicas, as porcentaxes do 60 por 100 e do 70 por 100 pasan a ser, respectivamente, do 65 por 100 e do 75 por 100.

### TÍTULO III

#### Medidas relativas ás ganancias e perdas patrimoniais

**Artigo décimo primeiro.** *Reducción a un ano do prazo para integra-las ganancias e perdas patrimoniais na parte especial da base imponible.*

O número 1 do artigo 39 da Lei 40/1998, do 9 de decembro, do imposto sobre a renda das persoas físicas e outras normas tributarias, queda redactado como segue:

«1. A parte especial da base imponible estará constituída polo saldo positivo que resulte de integrar e compensar exclusivamente entre si, en cada período impositivo, as ganancias e perdas patrimoniais que se poña de manifesto con ocasión de transmisións de elementos patrimoniais adquiridos ou de melloras realizadas neles, con máis dun ano de antelación á data de transmisión ou de dereitos de subscripción que correspondan a valores adquiridos, así mesmo, coa mesma antelación.»

**Artigo décimo segundo.** *Reducción dos tipos de gravame especiais para a determinación da cota íntegra estatal.*

O artigo 53 da Lei 40/1998, do 9 de decembro, do imposto sobre a renda das persoas físicas e outras normas tributarias, quedará redactado como segue:

«Artigo 53. *Tipos de gravame especiais.*

1. A base liquidable especial gravarase ó tipo do 15,30 por 100.
2. A base liquidable especial dos contribuíntes a que se refire o artigo 9, números 2 e 3 desta lei gravarase ó tipo do 18 por 100.»

**Artigo décimo terceiro.** *Reducción dos tipos de gravame especiais para a determinación da cota íntegra autonómica.*

O artigo 63 da Lei 40/1998, do 9 de decembro, do imposto sobre a renda das persoas físicas e outras normas tributarias, queda redactado como segue:

«Artigo 63. *Tipo de gravame especial.*

A base liquidable especial gravarase co tipo do 2,70 por 100.»

**Artigo décimo cuarto.** *Reducción da porcentaxe de retención e pagamento á conta aplicable ás rendas obtidas como consecuencia da transmisión ou reembolso de accións ou participacións en institucións de investimento colectivo.*

A porcentaxe aplicable ás rendas obtidas como consecuencia da transmisión ou reembolso de accións ou participacións en institucións de investimento colectivo, para o cálculo das retencións e demais pagamentos á conta do imposto sobre a renda das persoas físicas ou do imposto sobre sociedades, será o 18 por 100.

Regulamentariamente poderá modificarse esta porcentaxe.

## TÍTULO IV

**Medidas de apoio á internacionalización das empresas**

**Artigo décimo quinto.** *Medidas para evita-la dobre imposición internacional no imposto sobre sociedades.*

Con efectos para os períodos impositivos que se inician a partir da entrada en vigor do presente real decreto lei, incorpóranse dous novos artigos, 20 bis e 20 ter, na Lei 43/1995, do 27 de decembro, do imposto sobre sociedades, coa seguinte redacción:

«Artigo 20 bis. *Exención para evita-la dobre imposición económica internacional sobre dividendos e plusvalías de fonte estranxeira.*

1. Estarán exentos os dividendos ou participacións en beneficios de entidades non residentes en territorio español, cando se cumpran os seguintes requisitos:

a) Que a porcentaxe de participación, directa ou indirecta, no capital ou nos fondos propios da entidade non residente sexa, cando menos, do 5 por 100.

A participación correspondente deberase posuír de maneira ininterrompida durante o ano anterior ó día en que sexa esixible o beneficio que se distribúa ou, no seu defecto, deberase manter posteriormente durante o tempo necesario para completa-lo dito prazo. Para o cómputo do prazo terase tamén en conta o período en que a participación fose posuída ininterrompidamente por outras entidades que reúnan as circunstancias ás que se refire o artigo 42 do Código de comercio para formar parte do mesmo grupo de sociedades.

b) Que a entidade participada estivese gravada por un imposto de natureza idéntica ou análoga a este imposto no exercicio en que se obtivesen os beneficios que se reparten ou nos que se participa.

Para estes efectos, teranse en conta aqueles tributos estranxeiros que tivesen por finalidade a imposición da renda obtida pola entidade participada, sequera sexa parcialmente, con independencia de que o obxecto do tributo o constituía a propia renda, os ingresos ou calquera outro elemento indiciario daquela.

Presumirase cumprido este requisito, agás proba en contrario, cando a entidade participada sexa residente nun país co que España teña subscrito un convenio para evita-la dobre imposición internacional, que lle sexa de aplicación e que conteña cláusula de intercambio de información.

c) Que os beneficios que se reparten ou nos que se participa procedan da realización de actividades empresariais no estranxeiro.

Só se considerará cumprido este requisito cando polo menos o 85 por 100 dos ingresos do exercicio correspondan a:

a') Rendas que se obtivesen no estranxeiro e que non estean comprendidas entre aquelas clases de renda ás que se refire o número 2 do artigo 121 como susceptibles de seren incluídas na base imponible por aplicación do réxime de transparencia fiscal internacional.

En ningún caso se aplicará o disposto neste artigo cando a entidade participada que obteña esas rendas sexa residente nun país ou territorio cualificado regulamentariamente como paraíso fiscal.

En particular, para estes efectos, consideraranse obtidas no estranxeiro as rendas procedentes das seguintes actividades:

Comercio por xunto, cando os bens sexan postos ó dispor dos adquirentes no país ou territorio no que resida a entidade participada ou en calquera outro país ou territorio diferente do español, sempre que as operacións se efectúen a través da organización de medios persoais e materiais de que dispoña a entidade participada.

Servicios, cando sexan utilizados no país ou territorio no que resida a entidade participada ou en calquera outro país ou territorio diferente do español, sempre que se efectúen a través da organización de medios persoais e materiais dos que dispoña a entidade participada.

Crediticias e financeiras, cando os préstamos e créditos lles sexan outorgados a persoas ou entidades residentes no país ou territorio no que resida a entidade participada ou en calquera outro país ou territorio diferente do español, sempre que as operacións se efectúen a través da organización de medios persoais e materiais dos que dispoña a entidade participada.

Aseguradoras e reaseguradoras, cando os riscos asegurados se encontren no país ou territorio no que resida a entidade participada ou en calquera outro país ou territorio diferente do español, sempre que se efectúen a través da organización de medios persoais e materiais dos que dispoña a entidade participada.

b') Dividendos ou participacións en beneficios doutras entidades non residentes respecto das cales o suxeito pasivo teña a porcentaxe de participación prevista na alínea a), cando os referidos beneficios cumpran os requisitos establecidos neste número. Así mesmo, ganancias derivadas da transmisión da participación nas ditas entidades non residentes, cando se cumpran os requisitos do número seguinte.

Non se integrará na base imponible da entidade que percibe os dividendos a depreciación da participación derivada da distribución deles, nos termos previstos no número 5 do artigo 30 desta lei.

Para a aplicación deste artigo, no caso de distribución de reservas atenderase á designación contida no acordo social e, no seu defecto, consideraranse aplicadas as últimas cantidades aboadas ás ditas reservas.

2. Estará exenta a renda positiva obtida na transmisión da participación nunha entidade non residente en territorio español, cando se cumpran os requisitos establecidos no número anterior. O mesmo réxime se lle aplicará á renda obtida nos supostos de separación do socio ou disolución da entidade.

Os requisitos previstos nas alíneas b) e c) deberán cumprirse en todos e cada un dos exercicios de posesión da participación. O requisito previsto na alínea a) entenderase referido ó día no que se produza a transmisión.

Non se aplicará a exención cando o adquirente resida nun país ou territorio cualificado regulamentariamente como paraíso fiscal.

Nos seguintes supostos, a aplicación da exención terá as especialidades que se indican a seguir:

a) Cando o valor de mercado das participacións en entidades residentes en territorio español e dos activos situados no dito territorio que posúa a entidade non residente, directa ou indirectamente,

supere o 15 por 100 do valor de mercado dos seus activos totais.

Neste suposto, a exención limitarase a aquela parte da renda obtida que corresponda co incremento neto dos beneficios non distribuídos xerados pola entidade participada durante o tempo de posesión da participación.

b) Cando o suxeito pasivo efectuase algunha corrección de valor sobre a participación transmitida que resultase fiscalmente deducible.

Neste suposto, a exención limitarase ó exceso da renda obtida na transmisión sobre o importe da dita corrección.

c) Cando a participación na entidade non residente fose adquirida a outra entidade que reúna as circunstancias ás que se refire o artigo 42 do Código de comercio para formar parte dun mesmo grupo de sociedades, aplicaranse as seguintes especialidades:

a) A renda negativa obtida na transmisión da participación na entidade non residente, minorarase no importe da renda positiva obtida na transmisión da mesma participación á que se aplicase a exención.

b) A renda positiva obtida na transmisión da participación na entidade non residente será gravada ata o importe das rendas negativas obtidas en transmisións anteriores que se integrasen na base imponible deste imposto.

3. Non se aplicará o réxime previsto neste artigo:

a) Naqueles períodos impositivos nos que o suxeito pasivo teña a consideración de sociedade transparente.

b) Os dividendos ou plusvalías en relación cos cales a entidade aplique a deducción establecida nos artigos 29 ou 30 desta lei.

c) En relación con aquelas entidades filiais que desenvolvan a súa actividade no estranxeiro coa finalidade principal de gozar do réxime fiscal previsto nel. Presumirase que concorre a dita circunstancia cando a mesma actividade que desenvolva a filial no estranxeiro, en relación co mesmo mercado, fose desenvolvida con anterioridade en España por outra entidade, que cesase na referida actividade e que garde con aquela algunha das relacións ás que se refire o artigo 42 do Código de comercio, agás que se probe a existencia doutro motivo económico válido.»

**Artigo 20 ter. Exención de determinadas rendas obtidas no estranxeiro a través dun establecemento permanente.**

1. Estarán exentas as rendas positivas obtidas no estranxeiro a través dun establecemento permanente situado fóra do territorio español cando se cumpran os seguintes requisitos:

a) Que a renda do establecemento permanente proceda da realización de actividades empresariais no estranxeiro, nos termos previstos na alínea c) do número 1 do artigo 20 bis desta lei

b) Que a renda obtida polo establecemento permanente fose gravada por un imposto de natureza idéntica ou análoga a este imposto, nos termos do artigo anterior, e que non se ache situado nun país ou territorio cualificado regulamentariamente como paraíso fiscal.

2. Cando en anteriores períodos impositivos o establecemento permanente obtivese rendas negativas netas que se integrasen na base imponible

da entidade, a exención prevista neste artigo só se lles aplicará ás rendas positivas obtidas con posterioridade a partir do momento en que superen a contía das ditas rendas negativas.

3. Para estes efectos, considerarase que unha entidade opera mediante un establecemento permanente no estranxeiro cando, por calquera título, dispoña fóra do territorio español, de forma continuada ou habitual, de instalacións ou lugares de traballo nos que realice todo ou parte da súa actividade. En particular, entenderase que constitúen establecementos permanentes aqueles ós que se refire a alínea a) do número 1 do artigo 12 da Lei 41/1998, do 9 de decembro, do imposto sobre a renda de non residentes.

4. Non se aplicará o réxime previsto neste artigo cando se dean, respecto do suxeito pasivo ou das rendas obtidas no estranxeiro, as circunstancias previstas no último número do artigo anterior. A opción á que se refire a alínea b) do dito número será exercida por cada establecemento situado fóra do territorio español, mesmo no caso de que existan varios no territorio dun só país.»

**Artigo décimo sexto. Ampliación do prazo para o cómputo das deduccions para evita-la dobre imposición internacional.**

Con efectos para os períodos impositivos que se inicien a partir da entrada en vigor do presente real decreto lei, o prazo de sete anos ó que se refiren os artigos 29, número 4, e 30, número 4, da Lei 43/1995, do 27 de decembro, do imposto sobre sociedades, pasa a ser de dez anos.

**Artigo décimo sétimo. Deducción no imposto sobre sociedades por implantación de empresas no estranxeiro.**

Con efectos para os períodos impositivos que se inicien a partir da entrada en vigor do presente real decreto lei, engádesse un novo artigo, 20 quater, na Lei 43/1995, do 27 de decembro, do imposto sobre sociedades, coa seguinte redacción:

«Artigo 20 quater. *Deducción por investimentos para a implantación de empresas no estranxeiro.*

1. Será deducible na base imponible o importe dos investimentos efectivamente realizados no exercicio para a adquisición de participacións nos fondos propios de sociedades non residentes en territorio español que permitan acadar a maioría dos dereitos de voto nelas, sempre que se cumpran os seguintes requisitos:

a) Que a sociedade participada desenvolva actividades empresariais no estranxeiro, nos termos establecidos na alínea c) do número 1 do artigo 20 bis desta lei. Non caberá a deducción cando a actividade principal da entidade participada sexa inmobiliaria, financeira ou de seguros, nin cando consista na prestación de servizos a entidades vinculadas residentes en territorio español.

b) Que as actividades desenvolvidas pola sociedade participada non se exercesen anteriormente baixo outra titularidade.

c) Que a sociedade participada non resida no territorio da Unión Europea nin nalgún dos territorios ou países cualificados regulamentariamente como paraíso fiscal.

Esta deducción non estará condicionada á súa implantación contable na conta de perdas e ganancias.

2. O importe máximo anual da deducción será de 5.000 millóns de pesetas, sen exceder do 25 por 100 da base imponible do período impositivo previa ó cómputo daquela.

O importe da deducción reducirase na contía da depreciación do valor da participación tida nas sociedades non residentes que fose fiscalmente deducible.

O importe deducido na base imponible non dará dereito á deducción establecida no artigo 34 desta lei.

3. As cantidades deducidas integraranse na base imponible, por partes iguais, nos períodos impositivos que conclúan nos catro anos seguintes. Se nalgún destes períodos impositivos se producise a depreciación do valor da participación naquelas sociedades, integrárase na base imponible del, ademais, o importe da dita depreciación que fose fiscalmente deducible, ata completa-la contía da deducción.

O grao de participación e os demais requisitos esixidos para a deducción deberán cumprirse durante polo menos catro anos. Se non fose así, no período impositivo no que se produza o incumprimento integrárase na base imponible a totalidade da cantidade deducida que estivese pendente da dita integración.

4. O disposto neste artigo non será de aplicación en relación con aquelas entidades filiais que desenvolvan a súa actividade no estranxeiro coa finalidade principal de se beneficiaren da deducción prevista nel. Presumírase que concorre a dita circunstancia cando a mesma actividade que desenvolve a filial no estranxeiro, en relación co mesmo mercado, fose desenvolvida con anterioridade en España por outra entidade que cesase na dita actividade e que garde con aquela algunha das relacións a que se refire o artigo 42 do Código de comercio, agás que se probe a existencia doutro motivo económico válido.»

**Artigo décimo oitavo.** *Modificación do réxime das entidades de posesión de valores estranxeiros.*

Con efectos para os períodos impositivos que se inician a partir da entrada en vigor do presente real decreto lei, os artigos 129 a 132 da Lei 43/1995, do 27 de decembro, do imposto sobre sociedades, quedarán redactados da seguinte maneira:

«CAPÍTULO XIV

**Réxime das entidades de posesión de valores estranxeiros**

**Artigo 129.** *Entidades de posesión de valores estranxeiros.*

1. Poderán acollerse ó réxime previsto neste capítulo as entidades con obxecto social que comprenda a actividade de xestión e administración de valores representativos dos fondos propios de entidades non residentes en territorio español, mediante a correspondente organización de medios materiais e persoais.

Os valores representativos das participacións no capital das ditas entidades deberán ser nominativos. As sociedades transparentes non poderán beneficiarse do réxime deste capítulo.

2. A opción polo réxime das entidades de posesión de valores estranxeiros deberá comunicárselle ó Ministerio de Facenda. O réxime aplicarase desde

aquel período impositivo que finalice con posterioridade á dita comunicación.

**Artigo 130.** *Rendas derivadas da posesión de valores representativos dos fondos propios de entidades non residentes en territorio español.*

Estarán exentos os dividendos ou participacións en beneficios de entidades non residentes en territorio español, así como as rendas positivas derivadas da transmisión da participación correspondente, nas condicións e cos requisitos previstos no artigo 20 bis desta lei

Para os efectos de aplica-la exención, o requisito de participación mínima a que se refire a alínea a) do número 1 do artigo 20 bis considerarase cumprido cando o valor de adquisición da participación sexa superior a 6 millóns de euros (998.316.000 pesetas).

**Artigo 131.** *Distribución de beneficios. Transmisión da participación.*

1. Os beneficios distribuídos con cargo ás rendas exentas a que se refire o artigo anterior recibirán o seguinte tratamento:

a) Cando o perceptor sexa unha entidade suxeita a este imposto, os beneficios percibidos darán dereito á deducción por dobre imposición de dividendos nos termos establecidos no artigo 28 desta lei

b) Cando o perceptor sexa contribuínte do imposto sobre a renda das persoas físicas, o beneficio distribuído non dará dereito á deducción por dobre imposición de dividendos, pero poderase aplica-la deducción por dobre imposición internacional nos termos previstos no artigo 67 da Lei 40/1998, do 9 de decembro, do imposto sobre a renda das persoas físicas, respecto dos impostos pagados no estranxeiro pola entidade de posesión de valores e que correspondan ás rendas exentas que contribuísen á formación dos beneficios percibidos.

c) Cando o perceptor sexa unha entidade ou persoa física non residente en territorio español, o beneficio distribuído non se entenderá obtido en territorio español. Cando se trate dun establecemento permanente situado en territorio español, aplicarase o disposto na alínea a). A distribución da prima de emisión terá o tratamento previsto nesta alínea para a distribución de beneficios.

Para estes efectos, entenderase que o primeiro beneficio distribuído procede de rendas exentas.

2. As rendas obtidas na transmisión da participación na entidade de posesión de valores ou nos supostos de separación do socio ou liquidación da entidade, recibirán o seguinte tratamento:

a) Cando o perceptor sexa unha entidade suxeita a este imposto ou un establecemento permanente situado en territorio español, poderá aplica-la exención prevista no artigo 20 bis desta lei en relación coas diferencias de valor imputables ás participacións en entidades non residentes que cumpran os requisitos ós que se refire o número 1 do dito artigo, e o resto da renda obtida dará dereito á deducción por dobre imposición interna de plusvalías, nos termos establecidos no artigo 28 desta lei

b) Cando o perceptor sexa unha entidade ou persoa física non residente en territorio español, non se entenderá obtida en territorio español a renda que corresponda coas reservas dotadas con cargo ás rendas exentas a que se refire o artigo 20



bis ou con diferencias de valor imputables ás participacións en entidades non residentes que cumpran os requisitos a que se refire o número 1 do dito artigo.

3. A entidade de posesión de valores deberá mencionar na memoria o importe das rendas exentas e os impostos pagados no estranxeiro correspondentes a elas, e facilitarlles ós seus socios a información necesaria para que estes poidan cumprilo previsto nos números anteriores.

4. O disposto na alínea c) do número 1 e na alínea b) do número 2 deste artigo non se aplicará cando o perceptor da renda resida nun país ou territorio cualificado regulamentariamente como paraíso fiscal.

**Artigo 132. Aplicación deste réxime.**

1. A aplicación do réxime estará condicionada ó cumprimento dos supostos de feito relativos a el, que deberán ser probados polo suxeito pasivo a requirimento da Administración tributaria.

2. As contribucións non pecuniarias dos valores representativos dos fondos propios de entidades non residentes en territorio español beneficiaranse do réxime previsto no artigo 108 desta lei calquera que sexa a porcentaxe de participación na entidade de posesión de valores que as ditas contribucións confiran, sempre que as rendas derivadas dos ditos valores poidan beneficiarse do réxime establecido no artigo 20 bis desta lei»

**Artigo décimo noveno. Consultas tributarias en relación co réxime das entidades de posesión de valores estranxeiros.**

Incorpórase unha nova alínea g) no número 4 do artigo 107 da Lei 230/1963, do 28 de decembro, xeral tributaria, coa seguinte redacción:

«g) Interpretación e aplicación do réxime establecido para as entidades de posesión de valores estranxeiros na Lei do imposto sobre sociedades.»

**Artigo vixésimo. Exención no imposto sobre a renda das persoas físicas para os rendementos percibidos por traballos realizados no estranxeiro.**

Con efectos para os períodos impositivos que se inician a partir da entrada en vigor do presente real decreto lei, a alínea p) do artigo 7 da Lei 40/1998, do 9 de decembro, do imposto sobre a renda das persoas físicas e outras normas tributarias, queda redactada como segue:

«p) Os rendementos do traballo percibidos por traballos efectivamente realizados no estranxeiro, cos seguintes requisitos:

1.º Que os ditos traballos se realicen para unha empresa non residente en España ou un establecemento permanente radicado no estranxeiro.

2.º Que no territorio en que se realicen os traballos se aplique un imposto de natureza idéntica ou análoga á deste imposto e non se trate dun país ou territorio que fose cualificado regulamentariamente como paraíso fiscal.

A exención terá un límite máximo de 10.000.000 de pesetas anuais (60.101,21 euros). Regulamentariamente poderá modificarse o dito importe.

A presente exención será incompatible, para os contribuíntes destinados no estranxeiro, co réxime de excesos excluídos de tributación previsto no arti-

go 8.A.3.b) do regulamento deste imposto, aprobado polo Real decreto 214/1999, do 5 de febreiro, calquera que sexa o seu importe. O contribuínte poderá optar pola aplicación do réxime de excesos en substitución desta exención.»

**Artigo vixésimo primeiro. Opción por tributar por obriga persoal no imposto sobre o patrimonio dos traballadores desprazados ó estranxeiro.**

A alínea a) do número 1 do artigo 5 da Lei 19/1991, do 6 de xuño, do imposto sobre o patrimonio, queda redactada da seguinte maneira:

«a) Por obriga persoal, as persoas físicas que teñan a súa residencia habitual en territorio español, esixíndose o imposto pola totalidade do seu patrimonio neto con independencia do lugar onde se encontren situados os bens ou poidan exercer os dereitos.

Cando un residente en territorio español pase a te-la súa residencia noutro país poderán optar por seguir tributando por obriga persoal en España. A opción deberá exercela mediante a presentación da declaración por obriga persoal no primeiro exercicio no que deixase de ser residente no territorio español.»

**Disposición adicional primeira. Exención da vivenda habitual no imposto sobre o patrimonio.**

1. Engádeselle un novo número 9 ó artigo 4.º da Lei 19/1991, do 6 de xuño, co seguinte contido:

«Nove. A vivenda habitual do contribuínte, segundo se define no artigo 55.1.3.º da Lei 40/1998, do 9 de decembro, do imposto sobre a renda das persoas físicas, ata un importe máximo de 25.000.000 de pesetas (150.253,03 euros).»

2. Engádeselle un novo número 3 ó artigo 25 da Lei 19/1991, do 6 de xuño, co seguinte contido:

«3. En ningún caso serán obxecto de dedución as débedas contraídas para a adquisición de bens ou dereitos exentos. Cando a exención sexa parcial, será deducible, se é o caso, a parte proporcional das débedas.»

**Disposición adicional segunda. Réxime fiscal no imposto sobre sociedades e no imposto sobre a renda das persoas físicas de determinados préstamos de valores.**

Nos termos que regulamentariamente se determinen, non darán lugar a alteracións de patrimonio, no imposto sobre a renda das persoas físicas ou no imposto sobre sociedades correspondente ó prestamista, as operacións de préstamo de valores que cumpran os requisitos establecidos no artigo 36.7 da Lei 24/1988, do 28 de xullo, do mercado de valores, e na súa normativa de desenvolvemento.

**Disposición adicional terceira. Transmisións entre cónxuxes para efectuar contribucións a plans de pensións de acordo co artigo 46.1.6.º da Lei do imposto sobre a renda das persoas físicas.**

As transmisións entre cónxuxes que se produzan como consecuencia do establecido no artigo 46.1.6.º da Lei 40/1998, do 9 de decembro, do imposto sobre a renda das persoas físicas e outras normas tributarias, non estarán suxeitas ó imposto sobre sucesións e doazóns ata o límite previsto no citado precepto.

**Disposición transitoria primeira.** *Réxime aplicable á minusvalidez pendente de compensar no imposto sobre a renda das persoas físicas, xerada entre un e dous anos.*

As perdas patrimoniais netas ás que se refire o artigo 38, alínea b), da Lei 40/1998, do 9 de decembro, do imposto sobre a renda das persoas físicas e outras normas tributarias, correspondentes ó período impositivo 1999 que se encontren pendentes de compensación a 1 de xaneiro de 2000 e que se puxesen de manifesto con ocasión da transmisión de elementos patrimoniais adquiridos ou de melloras realizadas neles, con máis dun ano e ata dous anos de antelación á data de transmisión, continuarán compensándose de acordo co previsto no citado artigo 38, alínea b).

**Disposición transitoria segunda.** *Deduccións pendentes de aplicar procedentes dos artigos 29 bis e 30 bis da Lei do imposto sobre sociedades.*

As deduccións ás que se refiren os artigos 29 bis e 30 bis da Lei 43/1995, do 27 de decembro, do imposto sobre sociedades, pendentes de practicar trala finalización do período impositivo en curso á entrada en vigor deste real decreto lei, deduciranse nos períodos impositivos concluídos con posterioridade á dita data nas condicións e requisitos previstos neles.

**Disposición transitoria terceira.** *Adaptación ó novo réxime das entidades de posesión de valores estranxeiros.*

1. As entidades que á entrada en vigor deste real decreto lei teñan concedido o réxime das entidades de posesión de valores estranxeiros poderán renunciar a aplica-lo réxime do capítulo XIV do título VIII da Lei 43/1995, do 27 de decembro, do imposto sobre sociedades, nos termos establecidos por este real decreto lei, comunicándollo ó Ministerio de Facenda antes de que finalice o primeiro período impositivo que conclúa despois da súa entrada en vigor.

2. A conversión en nominativos dos valores representativos das participacións no capital das entidades que á entrada en vigor deste real decreto lei teñan concedido o réxime das entidades de posesión de valores estranxeiros deberá realizarse dentro do primeiro período impositivo no que sexa de aplicación o novo réxime.

**Disposición derogatoria primeira.** *Derrogación dos artigos 29 bis e 30 bis da Lei do imposto sobre sociedades.*

Con efectos a partir do 1 de xaneiro de 2001, quedan derogados os artigos 29 bis e 30 bis da Lei 43/1995, do 27 de decembro, do imposto sobre sociedades.

Non obstante, será de aplicación o previsto nos citados artigos para determina-la deducción sobre as rendas correspondentes a períodos impositivos iniciados antes da entrada en vigor do presente real decreto lei, mesmo que se obteña con posterioridade á dita data.

**Disposición derradeira primeira.** *Desenvolvemento regulamentario.*

Facúltase o Goberno para dictar cantas disposicións sexan necesarias para o desenvolvemento e execución da presente lei.

**Disposición derradeira segunda.** *Entrada en vigor.*

O presente real decreto lei entrará en vigor o día seguinte ó da súa publicación no «Boletín Oficial del Estado».

Dado en Madrid o 23 de xuño de 2000.

JUAN CARLOS R.

O presidente do Goberno,  
JOSÉ MARÍA AZNAR LÓPEZ

**11834 REAL DECRETO LEI 4/2000, do 23 de xuño, de medidas urxentes de liberalización no sector inmobiliario e nos transportes.** («BOE» 151, do 24-6-2000 e 154 do 28-6-2000.)

A evolución positiva da economía española, na que tiveron especial incidencia as medidas liberalizadoras acordadas polo Goberno, fai necesario seguir avanzando no proceso de liberalización para mante-lo ritmo de crecemento económico. Por outra parte, a interdependencia das economías, ó introducir certos elementos de comportamento imprevisible que poden repercutir desfavorablemente na evolución positiva producida ata agora na economía española, obriga tamén a adoptar certas medidas que eviten efectos indeseixables.

Por iso, este real decreto lei, no marco dun conxunto de medidas de natureza estrutural que con carácter de urxencia adopta o Goberno, co fin de evita-la aparición de desequilibrios macroeconómicos que ameacen a estabilidade e o proceso expansivo da nosa economía, céntranse, sen perde-la súa condición de medidas integrantes da política unitaria do Goberno, nos sectores da competencia do Ministerio de Fomento. O seu obxectivo fundamental é incidir de forma inmediata no comportamento dos distintos axentes económicos para estimula-la competencia, conseguir unha mellor asignación dos recursos e, en definitiva, influír positivamente sobre o nivel de prezos.

As medidas, polo tanto, que contén este real decreto lei proxéctanse sobre unha serie de sectores básicos da esfera de actuación do Ministerio de Fomento, como son o sector inmobiliario e o dos transportes, incluíndo a subministración de hidrocarburos ós buques nos portos para favorece-la competencia entre as empresas subministradoras.

Polo que respecta ó sector inmobiliario, as medidas que se adoptan pretenden corrixi-las rixideces advertidas no mercado como consecuencia do forte crecemento da demanda e a incidencia nos produtos inmobiliarios do prezo do solo, condicionada, pola súa vez, pola escaseza de solo urbanizable. En consecuencia, a reforma que se introduce haberá de incrementa-la oferta do solo ó eliminar aquelas previsións normativas en vigor que pola súa falta de flexibilidade a puidesen limitar, trasladando este efecto positivo ó prezo final dos bens inmobiliarios.

Por outra parte, e no que concirne tamén ó referido sector, o real decreto lei pretende clarifica-la situación actual do exercicio da actividade de intermediación inmobiliaria que se atopa afectada pola falta dunha xurisprudencia unánime que recoñeza que a dita actividade non está reservada a ningún colectivo singular de profesionais.

En relación co sector dos transportes, as medidas que contén este real decreto lei están chamadas a actuar sobre o réxime concesional dos servicios regulares de viaxeiros por estrada, reducindo os prazos das concesións, co fin de que a evolución da economía en xeral e do sector no seu conxunto repercutan con carácter inmediato na prestación do servizo. Esta redución de